


TEZAU LITURGIC
23 MARTIE

SLUJBA
SF.CUVIOS-
MĂRTURISITOR
SERGHIE
SREBRIANSKI
DE LA TVER



MOSCOVA, 2000



**Месяца марта в 23-й день
СЛУЖБА
Преподобному Сергию
исповеднику, архимандриту**

НА ВЕЛИЦЕЙ ВЕЧЕРНИ

Блажен муж: 1-й антифон.

На Господи воззвах: стихиры на 8, глас 3:

Днесь собрашася вкупе православных
множества, / во еже прославити предивнаго
исповедника Сергия, / земли Воронежския
преславное прозябение. / Иже подвиги своими
небесе достиже, / и прилежно ныне молится
Христу Богу, / о еже даровати всем верно
воспевающим Христа, / прегрешений
оставление // мир и велию милость.

Христу неустаннаго служителя, / превеликаго
Митрофана соименника, / преподобнаго
исповедника Сергия, / преславное торжество
воспевающе, / ныне прилежанию добродетели
научаемся. / Сей бо великий чудотворец /
сохрани неврежденно залог, ему от Бога
дарованный, / научает нас такожде благодать
Христову в себе сохранятьи, / и сим стезю
спасительную со тщанием проходяти, / во еже
получити от Христа Бога: / прегрешений

оставление // мир и велию милость.

Милосердия чудного проповедника, /
преподобномученицы Елисаветы претихаго
наставника, / стража неусыпнаго дивныя
обители Марфы и Марии, / преблаженного отца
нашего Сергия, / воспевающе, прославим сице:
/ О великий наставниче народа христианскаго,
/ дивно тобою восприятый дар любви Христовы,
/ помози и нам верным чадам твоим стяжати, /
и от Спасителя всех Бога восприяти: /
прегрешений оставление // мир и велию
милость.

Ины стихиры, глас 8:

Приидите верных множества, / восхвалити по
достоянию чуднаго светильника, / лика
преподобных сотрудника и праведных, / Сергия
богомудраго и прехвальнаго. / Сей бо неложно
исповестъ Христа пред человецы, / и бысть
глашатай истиннаго упования. / Егоже
взирающе на скочание жительства, /
подражающе вере его, // дерзновенно исповемы
Христа Бога в мире сем.

Придите православнии людие, / воспоим
великое подвигов множество / преподобнаго и
богоноснаго отца нашего Сергия. / Предивно во
иерейстем чине послужившаго, / и образ
прилежания о пастве нам оставившаго, / в
супружестве честном пожившаго, / и претихую

красоту того нам явившаго, / монашеское
поприще восприимшаго, / и до последнего
издыхания безукоризненно оное соблюдашаго. /
Сей бо молит ныне Подвигоположника Христа:
// о еже ниспослати нам мир и велию милость.
Приидите православных воинов полцы, /
прославим неустанного вашего молитвенника, /
преподобнаго Сергия исповедника. / Сей бо
восприял еси в душе своей оный глас Господень:
/ больше сея любви никтоже имать, / да кто
душу свою положит за други своя. / Сего ради
душу свою многожды полагал еси за вои
православныя, / оне же видяще таковую в ти
ревность по Бозе, / со всяким тщанием
проводяша своя ратныя труды, / за веру и
Отечество живот свой полагаючи. / Ныне же
мы, воспевающе твоя чудныя подвиги, взываем
сице: / буди предстательством твоим / воинству
нашему утверждение, // и на враги крепкое
одоление.

Слава, глас 4:

Взем на рамо свое Крест Господень, / шествовал
еси непорочно за Христом Богом, / отвергнувши
до конца гордыню с ея родоначальником
дьяволом, / испил еси до конца чашу страданий
Господних / купно с новомученики и
исповедники Российскими, / юже Сын
Человеческий обеща сыновом Зеведеовым / и

крещением обетованным с оными крестился еси,
/ и столп веры крепкий явился еси. / Непрестай
нас поминати верных чад твоих // Сергие
богомудре и треблаженне отче наш.

И ныне, глас той же: Иже Тебе ради...

Вход. Прокимен дне. И чтения.

Притчей чтение (главы 10, 3 и 8):

Память праведнаго с похвалами, / и
благословение Господне на главе его. / Блажен
человек, иже обрете премудрость, / и смертен,
иже уведет разум. / Лучше бо сию куповати, /
нежели злата и сребра сокровища. / Честнейшая
же есть камней многоценных, / все же честное
недостойно ея есть. / Долгота бо дней и лета
живота в деснице ея, / в шуйце же ея богатство
и слава. / От уст ея исходит правда, / закон же и
милость на языке носит. / Послушайте убо мене,
о чада, / честная бо реку, / и блажен человек,
иже пути моя сохранит. / Исходи бо мои - исходи
живота, / и уготовляется хотение от Господа. /
Сего ради молю вас / и предлагаю мой глас
сыновом человеческим: / яко аз, премудрость,
устроих совет, / и разум и смысл аз призвах. /
Мой совет и утверждение, / мой разум, моя же
крепость. / Аз мене любящая люблю, / ищущии
же мене обрящут благодать. / Разумейте убо,
незлобивии, коварство, / ненаказанныи же,

прилагайте сердца./ Послушайте мене и паки,/ честная бо реку,/ и отверзу от устен правая,/ яко истине поучится гортань мой,/ мерзки же предо мною устны лживыя./ С правдою вси глаголы уст моих,/ ничтоже в них стропотно, ниже развращенно./ Вся права суть разумевающим/ и проста обретающим разум./ Научу бо вас истине,/ да будет о Господе надежда ваша,/ и исполнитеся Духа.

Премудрости Соломоновы чтение (главы 10,6,8,9)

Уста праведнаго каплют премудрость: устне же мужей мудрых ведут благодать./ Уста мудрых поучатся премудрости, правда же избавляет их от смерти./ Скончавшуся мужу праведну, не погибнет надежда./ Сын бо праведен раждается в живот и во благих своих плод правды обымет./ Свет праведным всегда, и от Господа обрящут благодать и славу./ Язык мудрых добрая свесть, и в сердце их почиет мудрость./ Любит Господь преподобная сердца, приятни же Ему вси непорочнии в пути./ Мудрость Господня просвещает лице разумнаго./ Постигает бо желающия ю, прежде даже разумети ю, и удобь узрится от любящих ю./ Утреневавый к ней не утрудится, и бдяй ея ради вскоре без печали будет./ Яко достойных ея сама обходит, ищущи, и во стезях ея является

им благоприемне./ Мудрости никогдаже одолеет злоба./ Сих ради и рачитель бых доброты ея, и возлюбих ю, и поисках от юности мояя./ И взысках невесту привести себе, яко всех Владыка возлюби ю./ Тайнница бо есть Божия хитрости, и обретательница дел Его./ Труды ея суть добродетели: целомудрию же и разуму таучит, правде и мужеству,/ ихже потребнее ничтоже есть в житии человеком./ Аще же и многого искусства желает кто, весть древняя, и быти хотящая разсмотрит./ Свесть извития словес и разрешения гаданий, знамения и чудеса проразумеет, и сбытия времен и лет;/ и всем советник есть благ, яко безсмертие есть в ней и благославие во общении словес ея./ Сего ради беседовах ко Господу, и помолихся Ему, и рех от всего сердца моего:/ Боже отцев и Господи милости, сотворивый вся словом Твоим/ и мудростию Твоею устроивый человека, да владеет бывшими от Тебе тварьми и да управляет мир в преподобии и правде./ Дажь ми Твоих Престолов приседящую премудрость и не отлучи мене от отрок Твоих, яко аз раб Твой и сын рабыни Твоея./ Посли ю с Небес от святаго жилища Твоего, и от Престола славы Твоея,/ да, сущи со мною, научит мя, что благоугодно есть пред Тобою,/ и наставит мя в разум, и сохранит

мя в славе своей./ Помышления бо смертных
вся боязлива, и погрешительна умышления их.

Премудрости Соломоновы чтение (глава 3):

Праведных души в руце Божией, и не
прикоснется их мука./ Непщевани быша во
очесех безумных умерети, и вменися озлобление
исход их./ И еже от нас шествие сокрушение,
они же суть в мире./ Ибо пред лицом
человеческим аще и муку примут, упование их
бездмертия исполнено./ И в мале наказани
бывше, великими благодетельствовани будут,/
яко Бог искуси я и обрете их достойны Себе./
Яко злато в горниле, искуси их и яко всеплодие
жертвенное прият я./ И во время посещения их
возсияют и, яко искры по стеблию, потекут./
Судят языком и обладают людьми, и воцарится
Господь в них во веки./ Надеющийся Нань
разумеют истину и вернии в любви пребудут
Ему./ Яко благодать и милость в преподобных
Его, и посещение во избранных Его.

На литии стихиры, глас 2:

Ныне земля Воронежская преславно
ликовствует, / прославляя предивное свое
прозябение, / преподобного и богоносного отца
нашего Сергия. / Сей благоуханный крин
вертограда Христова, / возвратил Господь в краю

Святителя Митрофана. / Коего даровал
блаженному Сергию/ прилежным покровителем
и в бедах пречудным заступником. / О Сергие
пребогате, / буди отечеству твоему присный
заступник, / граду Воронежу, в немже млеко
богословия воспитан был еси, - утверждение, //
и всем согласно воспевающим тя - благолепное
украшение.

В земле Орловской благоизволи Архиерей
Небесный / ти отче Сергие о стаде овец
Христовых прилежати./ Ты же неустанно о
спасении оных подвизался еси, / и егда оныя на
брань с супостатом в дальние края быша
послани, / ничтоже сумняшеся вслед чад твоих
последовал еси. / На брани же, не жалея живота
своего, / паству своею неустанно окормлял еси.
/ Оныя же видя сугубое Твое о Христе горение,
// с великим дерзновением душу за Отечество
полагали есте.

Дивная похвало первопрестольному граду
Москве / пребогате Сергие ты явился еси, / егда
промышлением Господним, / ты избран был еси
духовным отцем / сестер честных обители
Марфы и Марии, / юже попечением
преподобномученицы Елисаветы / Бог на
твердом камени милосердия наздал еси. / Ты же
преславне Сергие, / духовным горением возжег
еси во обители сугубую ревность по Бозе, / еюже

движимии сестры обители / быша истовии
служителие Богу и ближним. / На оных и твоя
преподобне велиции подвиги взирающе //
прославляем Отца нашего Небесного.

Тверская похвало богоблаженне Сергие, /
рачением Христовым в лютую годину ты
прехвальне в весь Владычно вселился еси, / и в
подвизех, трудех и молитвах прилежно
подвизался еси. / Сего ради виде Господь безну
смирения твоего, возвышаемую превыше небес,
/ дарова тебе отче, чадом Своим во источник
преславный чудес, / от него же прилежно
почерплющи, / благодати Господней
сподобляются, / и в вере зело укреляются, / мы
же прибегающе к раце моще твоих / благодать
неизреченную восприемлем // прославляя
прославльшаго тя Господа.

Слава, глас 5:

Неможет укрытися град верху горы стоя, / - сие
евангельское слово в чудном Сергие воплощаемо
бысть. / Ибо всякий град и страна, / идеже
провождаше свой жизненный путь претихий
исповедник сей, / украшени быша предивными
подвигами онаго. / Мы же взирающе на тоlikое
сокровище Божественные благодати, / согласно
взываем ему, поюще: / не остави нас сырых /
бес твоего молитвеннаго предстательства, / но

буди милосердный утешитель, / всех к тебе с
молитвой прибегающих // богоносе Сергие.

И ныне, глас той же:

Блажим Тя, Богородице Дево, / и славим Тя,
вернии, по долгу, / град непоколебимый, стену
необоримую, / твердую предстательницу // и
прибежище душ наших.

На стиховне стихиры, глас 1:

Преподобне и богоблаженне Сергие, / ты
тесноту истинного пути Господня бодрено
перенесл еси / и во страданиях за Христа, яко
сребро в горниле очищен был еси. / И велиих
даров Святаго Духа сподобился еси, / не остави
нас предстательством твоим пред Господом, / но
буди нам присный ходатай, // прося нам мира
и велия милости.

Стих: Восхвалятся преподобнии во славе, / и
возрадуются на ложах своих.

Преподобне и богоглаголивне Сергие, / ты
неложно пастырем добрым / для всех чад твоих
был еси, / со всяким тщанием о спасении оных
подвизался еси. / Неустанно словом истины
Господней овец Христовых окормлял еси, / и ко
пристанищу небурному их провождал еси. /
Буди и ныне нам благим помощником, / и
сподоби нас молитвами твоими не вечерняго Дня
достигнути, // прося нам мира и велия милости.

Стих: Воспойте Господеви песнь нову, /
хваление Его в Церкви преподобных.

Преподобне и богоносне Сергие, / ты со всяким
тщанием воззванием Господне восприял еси, / и на
сердце твоём златыми писмены начертал еси: /
аще кто исповесть Мя пред человеки, / того Сын
Человечь исповесть пред ангелы. / Ты же
пречудне отче, дерзновенно Христа исповедал
еси, / ни во что же живот свой вменяючи. /
Сего ради блаженное исповедание от Господа
приял еси, / не остави нас чтущих подвиги твоя
блаженне, // прося нам мира и велия милости.

Слава, глас 6:

Честное житие боголюбезного Сергия, / ныне
согласно прославляюще, / терпению предивному
от него научаемся, / незлобию его пречудному
зело удивляемся, / трудолюбием прилежным
оного обогащаемся. / И великое множество его
добродетелей воспевающе, / прославляем его
прославльшаго Господа, / пребогато дарующего
нам молитвами святых // мир и велию милость.

И ныне, глас той же: Творец и Избавитель...

Тропарь, глас 8:

Доблий воинов Российских пастырю, /
благочестия и веры крепкий адаманте, /
преподобномученицы Елисаветы бодренный
сподвижниче, / мудрый наставниче сестер

обители Милосердия,/ незлобиво узы
претерпевый за Христа/ и велиих даров Святаго
Духа сподобльшийся,/ исповедниче и
равноангельне подвижниче Сергие,/ моли
Христа, Емуже добре послужил еси// смирение
спасительное нам даровати.

Ин тропарь, глас 1:

Блаженство чистоты сердечныя стяжав,/
богомудре отче Сергие,/ богозрачныя доброты
наслаждаяся,/ орган божественнаго Утешителя
явился еси,/ страждущаго Христа в ближнем
узрел еси,/ Того смирению причастник явился
еси./ Слава, на камени исповедания
Утвердившему тя./ Слава, Венчавшему труды
твоя.// Слава, доброту пастырства тобою
Явльшему.

Ин тропарь, глас 2:

Милосердия неустанного проповедника,/ и
предивного о нас молитвенника,/ наставника
богомудрого, и исповедника превеликаго,/
чудотворца претихаго, и ходатая пред Богом
прилежнаго,/ преподобнаго и богоноснаго отца
нашего Сергия,/ воспевающе велегласно,
молим:/ испроси нам у великодаровитаго
Господа// оставления грехов и велию милость.

НА УТРЕНИ

На Бог Господь: тропарь святаго дважды.
Слава, и ныне, Богородичен.

По 1-м стихословии седален, глас 4:

Священного учителя воспоим прилежно, / яко
сей усердно нучает ны / своим словом, житием
и многими подвиги / превеликим добродетелем:
/ кротости, вздержанию, смирению, терпению и
любви. / Мы же ныне прилежно внимающе /
оному научению, воззовем сице: / пребогате
отче Сергие, неустанный ходатай буди / всем
верою и любовью чтущим пречестную память
твою.

Слава, и ныне. Богородичен:

Пренепорочная Владычице Мати Господа, /
неувядаемый Цвете райский, / золотая Стамно -
Манны, / горо святая от Ней же нерукосечно /
чудный Камень отсечеса. / Тебе бо Чистая
немолчно воспевают и блажат ангели и
человецы: / буди непреложная Ходатаице всем
верою и любовью, // поклоняющимся
пресвятому Рождеству Твоему.

По 2-м стихословии седален, глас 5:

Любовию небесною украшен был еси, /
богомудре преподобне Сергие, / красная мира
сего ни во что же вменив, / научил еси коегождо

прилежно поприще своя жизни безропотно
проводжати, / и неустанно имя Христово
призывать, / и ближния в напасти неоставляти,
/ наипаче же о горнем злате помышляти / и в
Бога добродетелию богатети. / Мы же ныне
прилежно внимающе / оному научению,
воззовем сие: / пребогате отче Сергие,
неустанный ходатай буди / всем верою и
любовию чтущим пречестную память твою.

Слава, и ныне. Богородичен:

Крепкое заступление к Тебе прибегающих, /
Пресвятая Мати Дево Богородице, / неостави
нас Своею молитвою, / наипаче со тщанием
призри на ны обуреваемые житейскими
волнами / и пристанища разве Тебе тихого
неимущия, / и присно управи ны ко спасению, /
во еже со Архангелом воспевати Ти: //
Благодатная Дево радуйся.

Величание:

Величаем тя, / преподобне отче наш Сергие, / и
чтим святую память твою, / милосердия
неустанного проповедника, // и неуклонна
Христова исповедника.

Псалом избранный: Блажен муж бояйся Господа:

По полиелее седален, глас 6:

Сергию богомудрому подражающе, / возлюбим
паче прочих дородетелей милосердие, / оного

неустанный проповедник был еси, / вся верныя
поучал еси, / наипаче в любви к ближнему
подвизаться, / ибо сие бо есть златый путь к
Небесному Отвечеству, / его же проходяще со
тщанием / сподобимся восприяти грехов
оставление // и душам наших спасение.

Слава:

Сестер обители Марфы и Марии добрый
учителю, / премудрый наставниче
преподобномученицы Елисаветы, / добрый
пастырь воинства Русского, / монашествующих
славное утверждение, / пастырей предивная
похвало, / всем христианом правело
добродетели, / неостави нас своим
заступлением, // но присно о нас моли
Триединого Бога.

И ныне. Богородичен:

Пренепорочная Владычице / Мати Творца
небеси и земли / от славного Гавриила
приемшая / чудное приветствие: радуйся. /
Прими и ныне от нас сия хвалебная пения / и
купно с преподобным отцем нашим
исповедником Сергием, / моли Сына Твоего
Христа Бога нашего // да спасет Тобою
Пречистая души наша.

Таже степенна, 1-й антифон 4-го гласа.

Прокимен, глас 4-й: Честна пред Господом /
смерть преподобных Его. Стих: Что воздам
Господеву о всех, яже воздаде ми?

Всякое дыхание: Евангелие от Матфея, зачало 15.

По 50-м псалме стихира, глас 6:

Преподобне отче исповедниче Сергие, / во всю
землю изыде вещание исправлений твоих, / тем
на Небесех обрел еси мзду трудов твоих, /
демонския погубил еси полки / и Ангельския
достигл еси чины, / ихже житию без порока
поревновал еси, / дерзновение имея ко Христу
Богу, // мир испроси душам нашим и велию
милость.

Канон Октоиха Богородицы на 6, глас 3, егоже
краестрочие: Пою третье пение Тебе
Богородице: и канон преподобного на 8.

Песнь 1.

Ирмос: Воды древле, / манием божественным, /
во едино сонмище совокупивый, / и разделивый
море израильтейским людем, / сей Бог наш, /
препрославлен есть: / тому единому поим, яко
прославися.

Се ныне Господи Боже наш, / даруй нам
грешным воспети по достоянию / со
блогоговением и усердием песнь угоднику
Твоему Сергию, / яко в житии своем

непрестанно Тебе Единому взывал еси, // яко прославися.

Еже исполни Свое предивное смотрение непостижимый Господь, / благоизволи родиться избраннику Своему в земли Воронежстей, / и сего ради благоговейнии родители нарекоша красно чадо сие / именем первого светильника земли сия Митрофана, / яко той прилежно поучал еси вся пети: // Владыце Единому поим, яко прославися.

Ради стяжания духовного звания / богобоязненный иерей Василий / отда чадо свое на учение / в школу духовную града Воронежа. / В ней же прилежно поучался еси пети Богу: // яко прославися.

Богородичен: Госпоже Пречистая / всякий род немолчно воспевае Тя, / яко безсеменно родила еси / Егоже вся воинства небесная трепещут, воспевающе: / сей Бог наш, препрославлен есть: // Тому единому поим, яко прославися.

Катавасия по Уставу.

Песнь 3.

Ирмос: Иже от не сущих вся приведый, / Словом созидаемая, / совершаемая Духом, / Вседержителю Вышний, / в любви Твоей утверди мене.

Иже древле прельсти в рай Еву / тщался еси

юнаго Митрофана/ отвадети от благаго
священнического поприща/ и побуди его
изшедша из духовных школы,/ в далеком граде
Варшаве вступить на мирскую стезю,/ но туне
быша старания лукаваго,/ яко и zde сей
избранник Христов, прилежно взывал еси://
Вседержителю Вышний, в любви Твоей утверди
мене.

Юже, Христе, благоизволил еси рабу Твоему
Митрофану в жены,/ обретесе ему в стране
Польской./ И тако Господь, обращающий
лукавая во благая,/ незримо промышлял о
избраннике Своем,/ и той во умилении вопиял
еси:// Вседержителю Вышний, в любви Твоей
утверди мене.

Божественною ревностию распаламь,/ восхотел
еси всего себе, богомудре Митрофане,/ отдати
на служение ближнему,/ но добре разумев, яко
всяко мирское служение суетно есть,/ возжелал
еси восприяти дар священства./ Сего ради со
своею супружницею возвратился еси в отчий
дом,/ идеже паки воззвал еси:// Вседержителю
Вышний, в любви Твоей утверди мене.

Богородичен: **О**, велие чудо!/ **О**, предивное
явление! - рождество Твое Богорадованная,/ яко
сим мы от адских уз избавихомся/ и во
благоговении научихомся/ прилежно пети Сыну

Твоему и Богу нашему: // Вседержителю
Вышний, в любви Твоей утверди ны.

Ин кондак, глас 2:

Насладився Богомудре воздержания, / и
желания плотская ты успил еси, / явився верою
возвращаемь, / и яко живота древо райское
процвел еси, // Сергие отче священнейший.

Седален, глас 5:

Днесь сошедшеся восхвалим вернии /
преподобного отца нашего Сергия, / яко житием
своим прилежно научает нас: / неленносно
Христа в мире сем исповедавати, / душу свою
молитвою питати, / путем милосердия неустанно
шествовали, / светильником Слова Божия мглу
неведения разгоняти, / и во умилении Господу
взывать: // разве Тебе, Христе, инаго Бога не
вены.

Слава, и ныне. Богородичен:

Пресвятая Дево Владычице, / Тебе, вся наша
нужды ведающей, / и предстательством Своим
верныя не оставляющей, / молимся прилежно, /
буди нам пред престолом Сына Твоего
милостивая ходатаице, / прилоги вражия от нас
отгоняющая, / и ко спасению верно
наставляющая, / вся смиренно вопиющая: //
разве Тебе, инаго Покрова не имамы.

Песнь 4.

Ирмос: Положил еси к нам твердую любовь
Господи, / Единородного бо Твоего Сына за ны
на смерть дал еси. / Темже Ти зовем
благодаряще: / слава силе Твоей Господи.

Господь видя смиренное желание раба Своего
Митрофана/ служение священническое
подъяти,/ сподоби его восприяти сей
превеликий дар/ у мощей угодника Своего
святителя Митрофана./ Прием же оный абие,
благодаряще Христа, воспел еси:// слава силе,
Твоей Господи.

О спасении чад Своих промышляя,
Премилостивый Господь,/ благоизволи
благоговейному иерею Своему Митрофану/
проходить стезю служения своего в
богоспасаемом граде Орле,/ и наставляти
наипаче воинов христолюбиваго войска
Российского./ Ихже прилежно окормляти /
словом Христовой истины потщался еси, // поя
Богу: слава силе, Твоей Господи.

Бог, видя с прилежанием производимое
попечение/ об овцах Своего стада,/ сподоби
богомудрого Мирофана/ быти свидетелем
пречуднаго прославления/ великаго угодника
Христова Серафима,/ идеже видя пребогатые
знамения благодати Господней,/ воззвал
прилежно:// слава силе, Твоей Господи.

Богородичен: Лицы ангел и святых собори / не
возмогша по достоянию Тя восхвалити Мати
Христову, / мы же грешнии дерзающе пети Тебе,
молим: / да призриши милостивым Твоим оком на
ны немощныя, / поющия Сыну Твоему: // слава
силе, Твоей Господи.

Песнь 5.

Ирмос: К Тебе утренюю всех Творцу, /
преимуществу всяк ум мирови, / зане свет -
повеления Твоя: / в нихже настави мя.

Аще кто душу свою положит за други своя / той
имать, - рече Господь, - ввещую любовь, / сего
ради боголюбезный Митрофан, / ни во что жизнь
свою вменивши, / последовал еси вслед паствы
своея / на поле брани в дальний край, // идеже
прилежно послужил еси Господу, Отечеству и
людem.

Живота своего нещадити ради веры Христовы и
Отечества, / ты отче Митрофане научаеши, / и
мы внемлуще словесем твоим, / взываем к
Единой Надежде нашей: // светом повелений
Твоих, Господи, настави ны.

Еже промышляет о спасении коегождо, / дарова
разум прилежному служителю Своему
Митрофану, / во еже како подобает устроить
чудную обитель Марфы и Марии, / юже
возжелала еси создати угодница Христова

Елисавета Феодоровна./ Ей же стал еси
сотрудником и помощником// сей избранник
Христов Митрофан.

Богородичен: Некогда дерзость Аффониеву
отмстившая Пресвятая Дево,/ абие по
обращении оною исцеление тому подала еси./
Тако и ныне от сумнений своих раб Господень
Митрофан / оным недугом подажен был еси,/ но
быв тако вразумлен, от Тебе Пречистая/
свобождение от немощи радостно приял еси,/
взывая: радуйся, Благодатная, Господь с Тобою.

Песнь 6.

Ирмос: Бездна последняя грехов обыде мя, / и
исчезает дух мой; / но прострый Владыко
высокую Твою мышцу, / яко Петра мя
Управителю спаси.

Ни како же отлучаяся, пребывал еси Господь
неотступно/ подле неустаннаго делателя
вертограда Своего богомудраго Митрофана./
Сей же, со всяким усердием, день и ночь
подвизался еси/ о спасении сестер дивныя
обители милосердия,/ в ней же постави Господь
сего служителя Своего стражем духовным,/ во
еже поучати всех непрестанно пети:// яко
Петра мя Управителю спаси.

О велие чудо, даровася Отечеству нашему,/ аки
сад Едемский расцвела еси пречудно святая

обитель Марфы и Марии, / благовоением
милосердия источая во вся пределы
Российския / благоухание Христовой благодати, /
сего ради мнози видящий сие знамение, / паки
ко Господу прибегаху, взывая: // яко Петра мя
Управителю спаси.

Мощно ли скрытися граду верху горы стоящу? / -
Несть, - рече Господь, / тако воистину был еси
ты отче наш Митрофане аки град благодатен, /
венчающ гору милосердия святых обители
Марфы и Марии. / В ней же ты кормчим от
Христа поставлен был еси, / во еже неленно
воспевати: // яко Петра мя Управителю спаси.

Богородичен: Утешение нам рождающая -
Избавителя и Спаса всех Христа, / Дево
Пречистая Богородице, / неустанно хвалим Тя,
Непорочная, // и превозносим преславное Твое
Рождество.

Кондак, глас 3:

Божественнаго Духа храм предивен явился еси,
/ евангельских добродетелей певец неустанен. /
Богу, Церкви и Отечеству прилежно послужил
еси, / и нас любви к Богу и ближним словом и
житием своим научил еси. / Исповедал еси
небоязненно пред гонители Слово явльшееся в
плоти, / суровы лишения и узы претерпел еси. /
Сего ради от Христа Бога великия дарования
прием, / знамения благодати обильно являеши.

/ Сергие пречудне отче моли / и нам грешным
чадом Твоим // на небеси некрадомое
сокровище восприяти.

Икос:

От юности Крест Господень взял на рамо свое, /
последовал еси узким путем в след
Божественного Учителя, / во всем был еси верен
Ему, / со смирением приемля от Него вся
промышления: / во учении прилежно
подвизался еси, / блаженного супружества
сподобился еси, / во священстве данный ти
закон верно соблюдал еси, / воинства нашего
добрый пастырь был еси, / воистину неусыпный
страж обители Марфы и Марии явился еси, /
лику монашествующих радостно приобщился
еси, / от безбожных горькия узы кротко
претерпел еси, / даром чудотворения славно
обогатился еси, / блаженную кончину мирно
приял еси, / но не оставил еси своим
попечением верных чада своя. / Мы же ныне
воспевающе предивныя подвиги Твоя, /
прилежно взываем Ти: / Сергие пречудне отче
моли / и нам грешным чадом Твоим // на
небеси некрадомое сокровище восприяти.

Песнь 7.

Ирмос: Якоже древле благочестивыя три отроки
оросил еси / в пламени халдейстем, / светлым
Божества огнем и нас озари, / благословен еси,
взывающия, Боже отец наших.

Время сугубых испытаний встретил еси / отче
наш Митрофане во всеоружии добродетелей / и
премного паче сил оберегал еси / вверенный ти
залог Христов от расхищения, / егоже хищницы
тщяхуся поспрати, / но ты непреклонно бдел еси, /
попя непрестанно: // благословен еси, Боже отец
наших.

О, неизреченна Премудрость Божественного
промысла, / исполни тя Господь, отче
многочадия духовна / и призва с супружницею
твоею к житию постническому / егоже
восприемля наречен был еси именем великаго
Сергия, / коему последуя, непрестанно пел еси:
// благословен еси, Боже отец наших.

Сергие богомудре отче наш, / ты безропотно
притерпел еси узы за Христа, благословляя
гонители своя, / поучал еси ближния бояться
паче / могущего душу и тело погубити в геене
огненной, / и призывал еси всякаго немолчно
пети: // благословен еси, Боже отец наших.

Богородичен: Пречистая Приснодево, / Ты еси
неувядаемый Цвет целомудрия, / возростившая
Превеликий Плод чистоты, / Ты еси стамна

златая,/ носившая Манну Зиждительную,/ Ты
еси храм Соломонов,/ содержащая в Себе
Пречудное Облако благодати,/ буди прилежная
предстательнице пред Сыном Твоим/ всем
поющим Ему:// благословен еси, Боже отец
наших.

Песнь 8.

Ирмос: Нестерпимому огню соединившись, /
богочестия предстояще юноши, / пламенем же
невреждени, Божественную песнь пояху: /
благословите вся дела Господня Господа, / и
превозносите во вся веки.

О, премного паче сил отяготишася/ сестры
обители блаженных Марфы и Марии,/ егда
безбожнѣя разоряху обитель сию,/ но ты еси
отче/ кротчайшим гласом наставляя еси я/
бодренно пети в сей напасти Христу Богу://
благословите вся дела Господня Господа, и
превозносите во вся веки.

Иже заблудшыя овцы взыскуя,/ Ты еси Христе
Боже наш,/ направил еси блаженного отца
нашего Сергия в пределы Тверския,/ дабы в
лютую годину, егда вера истинная бысть в
поношении,/ был еси в земли сей пастырь
добрый,/ стрегущий от расхищения, Христе,
овец Твоего стада,/ и неустанно их поучающий,
Ти вопити:// благословите вся дела Господня

Господа, и превозносите во вся веки.

Многоочитии херувими и шестокрилатии серафими/ немолчными гласы прославляют Христа Бога нашего,/ мы же последующе им/ купно с преподобным и богоносным отцем нашим Сергием,/ славяще Единого в Троице Бога, взываем во умилении:// благословите вся дела Господня Господа, и превозносите во вся веки.

Богородичен: Христово освященное божественное Вместилище радуйся,/ яко Тобою неложна живота сподобихомся/ и от тли избавихомся,/ ныне же нас не забуди Ты величающих, Пресвятая Дево,/ и согласно Господа поющих:// благословите вся дела Господня Господа, и превозносите во вся веки.

Песнь 9.

Ирмос: Новое чудо и боголепное: / девическую бо дверь затворенную яве проходит Господь, / наг во входе, / и Плотносец явился во исходе Бог, / и пребывает дверь затворена: / Сию неизреченно, яко Богоматерь величаем.

Волею Божией даровася нам превеликий ходатай и молитвенник,/ богоблаженне отче наш Сергие,/ мы же чада его прилежно вопием ему:/ не забуди молитвами твоими, отче:/ земли в нейже родился еси,/ духовныя школы в нейже

нектар богословия почерпал еси,/
христолюбивое воинство, его же словом истины
окормлял еси,/ и вся ны, к тебе в молитве
прилежно прибегающия// и Пречистую Деву,
яко Богоматерь величающия.

Ангелоподобным житием подвизался еси,/ ты
отче наш Сергие,/ и ныне монашествующих
укрепи молитвами Твоими к Подвигоположнику
Христу,/ дабы сии от тебе прилежно поучались/
смирненно свое поприще проходить// и
Препоблагословенную, яко Богоматерь величати.

Любовь, яже превыше всякия добродетели, имел
еси отче/ и ныне прилежно молим тя святе:/ да
испросиши у Христа Бога и нам грешным/
оного предивнаго сокровища стяжати// и
Пренепорочную, яко Богоматерь величати.

Богородичен: Утроба Девы бысть
пространнейшая небес,/ яже Невместимаго
вместила еси,/ сего ради всякий род хвалит Ея,/
с Гавриилом: радуйся приносящи,/ / и сию
неизреченно, яко Богоматерь величающи.

Светилен:

Света Подателю и веков Творче Господи, /
просвещай и освящай всякаго человека
грядущаго в мир, / знаминася свет Лица Твоего
на богоблаженном исповеднике Сергие, / и сей
бысть, по глаголу Твоему, воистину свет миру и

соль земли, / егоже ублажающе, / прославляем
Тя Свете истинный.

Слава, и ныне. Богородичен:

Пресветлая Заре Божественного Света, /
Пресвятая Богородице Марие, / ныне прими
нашу хвалебную песнь, / к Тебе во умилении
вопиющих, / и умоли Сына Твоего Христа Бога
нашего: / Светом Божественных благодати
Своя // расточити тьму прегрешений наших.

На хвалитех стихиры святого на 4, глас 3:

Торжество совершающе богоблаженного Сергия
исповедника, / прославляем неизреченное
милосердие Божие, / ибо небесе и земли
Владыка, / дарова нам такового предивного
предстателя, / добродетели изрядного учителя, /
благолепия церковного блюстителя, / прилежна
о нас молитвенника // научающего нас
воспевати Христа во веки.

Претихаго Сергия торжество совершающе, /
поминаем онаго чудных подвижи: / прилежное о
пастве попечение, / молитвы, бдения и
пощения, / дерзновенное Христа исповедание. /
Сих же ради обильно благодать Христова на нем
почила еси, / и даровала еси его прилежна о
верных молитвенника, // научающего
воспевати Христа во веки.

Ныне собравшися вкупе, православных людей

множества, / радостно недоумеюще: / како
Божия мудросте и сило, / пречудно управляет нас
ко спасению, / даруя нам превеликое
сокровище / честныя тела Своих угодников, /
истощающия обильныя струи благодати, / от
нихже вся верно черплющие / непременно
дивной помощи сподобляются. / Такжеде
славныя и честныя мощи богоносного
исповедника Сергия, // быша нам сокровеще
преславное.

Слава, глас 2:

Единого от чудного сонма новомученник и
исповедник Российских, / милосердия великаго
проповедника, / преподобномученицы
Елисаветы славнаго сподвижника, / земли
Русския преславное украшение, / воинству
нашему предивное утверждение, / пастырем,
монахам и мирским от бед ограждение, //
богомудрого отца нашего Сергия воспеваем
торжество.

И ныне, глас той же:

Непроходимая врата / тайно
запечатствованная, / благословенная
Богородице Дево, / прими моления наша, / и
принеси твоему Сыну и Богу, // да спасет Тобою
души наша.

НА ЛИТУРГИИ

Блаженны от канона святого, песнь 3-я и 6-я.

Прокимен, глас 7: Восхвалятся преподобнии во славе, / и возрадуются на ложах своих.

Стих: Воспойте Господеви песнь нову, / хваление Его в Церкви преподобных.

Апостол к Ефесеем, зачало 233. Аллилуия, глас 6:

Блажен муж, бояйся Господа, в заповедех Его восхощет зело.

Стих: Сильно на земли будет семя его.

Евангелие от Луки, зачало 64.

Причастен: В память вечную будет праведник:

